



Na osnovu člana 18. stav 1. Zakona o kantonalnim ministarstvima i drugim tijelima kantonalne uprave ("Službene novine Zeničko-dobojskog kantona", broj 10/15.), a vezi sa članom VI Strategije kulturne politike Zeničko-dobojskog kantona za period 2014.-2020. godina ("Službene novine Zeničko-dobojskog kantona", broj: 5/14.), ministar Ministarstva za obrazovanje, nauku, kulturu i sport, d o n o s i :

Principe zaštite i očuvanja kulturne baštine na području Zeničko-dobojskog kantona

I

Na području Zeničko-dobojskog kantona se nalazi 56 nacionalnih spomenika proglašenih od strane Komisije/Povjerenstva za očuvanje nacionalnih spomenika, također, i veliki broj evidentiranih i kategoriziranih kulturno-historijskih spomenika, ali i značajan broj neevidentiranih i nekategoriziranih dobara kulturne baštine. Među proglašenim nacionalnim spomenicima se nalaze i neki od najznačajnijih kulturno historijskih spomenika Bosne i Hercegovine. Stoga, može se zaključiti da se na području Zeničko-dobojskog kantona nalazi veliki kulturni kapital koji je potrebno staviti u funkciju razvoja.

II

S obzirom na to da na području Kantona djeluju samo tri muzejske institucije koje imaju svojstvo pravnog lica, kao i da nije formiran Zavod za zaštitu kulturne baštine, može se zaključiti da jedan dio kulturne baštine nije evidentiran i sistematizovan, da nema adekvatnu zaštitu i tretman, da ne postoji adekvatna briga, te da postoji stalna opasnost od destrukcije i otuđenja dijelova kulturne baštine.

III

Stoga je potrebno podsjetiti, u skladu sa *Zakonom o zaštiti kulturne baštine* („Službene novine Zeničko-dobojskog kantona“, broj: 2/00. i 9/15.), prije svega općine koje nemaju muzejske ustanove, na obavezu čuvanja, stručnog nadzora i osiguranja evidentiranih kulturnih dobara, ali i kulturnih dobra koja nisu evidentirana. U ovom pogledu nužna je koordinacija nadležnih općinskih službi sa Ministarstvom za obrazovanje, nauku, kulturu i sport Zeničko-dobojskog kantona.

IV

Svjesni činjenice značaja kulturne baštine za općine na području Kantona, Grad Zenicu i sam Zeničko-dobojski kanton neophodno je da svaka općina na području Zeničko-dobojskog kantona, Grad Zenica i sam Zeničko-dobojski kanton analiziraju postojeći sistem zaštite i očuvanja kulturne baštine te odnos prema dosadašnjem, osobito održivom, korištenju baštine te da se utvrde ciljevi, mjere i aktivnosti kako bi se kulturna baština i njeni potencijali uspješnije i učinkovitije koristili kao razvojni resurs, prije svega u kontekstu kulturnog turizma.

V

S obzirom na navedeno potrebno je poštovati sljedeće mjere i osnovna načela zaštite kulturne baštine:

- Zeničko-dobojski kanton, općine Kantona i Grad Zenica svjesni su da sveukupna kulturna baština predstavlja jednu od temeljnih vrijednosti i glavnih resursa za daljnji razvitak.
- Zeničko-dobojski kanton, općine Kantona i Grad Zenica nastaviti će poduzimati sve potrebne aktivnosti koje vode potpunoj provedbi međunarodnih konvencija međunarodnih organizacija, direktiva i uredbi EU-a kojima se uređuje područje kulturne baštine.
- Vlada Zeničko-dobojskog kantona i Ministarstvo za obrazovanje, nauku, kulturu i sport će u narednom periodu u skladu sa donesenom Odlukom o usvajanju *Elaborata o društveno-ekonomskoj opravdanosti osnivanja Zavoda za zaštitu kulturne baštine Zeničko-dobojskog kantona* i ukupnom finansijskom situacijom, nastojati formirati Službu za zaštitu baštine pri Ministarstvu za obrazovanje, nauku, kulturu i sport (u skladu sa Zakonom o zaštiti kulturne baštine „Službene novine Zeničko-dobojskog kantona“, broj: 2/00. i 9/15.), i to do formiranja Zavoda za zaštitu kulturne baštine.
- Posebna pažnja će se usmjeriti na mjere zaštite proglašanih nacionalnih spomenika.
- Nadležne općinske službe u općinama u kojima ne postoje muzeji kao samostalna pravna lica trebaju izraditi evidencije kulturne baštine na području općina.
- Katedra za opću kulturologiju Filozofskog fakulteta Univerziteta u Zenici će u narednom periodu organizirati predavanja i radionice o kulturnoj baštini Zeničko-dobojskog kantona.
- Zeničko-dobojski kanton, općine Kantona i Grad Zenica će razvijati saradnju i partnerstvo u cilju zaštite i afirmacije kulturne baštine.

VI

Ovi principi stupaju na snagu danom donošenja.

Broj: 10-40-3999-5/16.
Zenica, 21.11.2016. godine



MINISTAR

Mensur Sinanović

